

INUIT ATAQATIGIIT

INATSISARTUNI



12. august 2016

EM 2016/107

Inatsisartut suleriasianni § 33 naapertorlugu aaliangigassatut siunnersuut imaattoq matumuuna saqqummiuppara:

Ilaqutarittut inuunermut iluaqutaanerusumik sulisoqarnermut politikkeqalernissaq anguniarlugu Naalakkersuisut UPA2017-mut iliuusissanik nassuaasiornissamik peqquneqarnissaannik Inatsisartut aaliangiiffigisassaattut siunnersuut.

(Inatsisartunut ilaasortaq Sara Olsvig, Inuit Ataqatigiit)

Tunngavilersuut:

Nunatsinnit inuttaqqortussuseq ukiuni kingullerni appariartorsimavoq. Ineriarneq tamanna isumakulunnartoqarpoq. Ukiut qulikkaat tulliuttut eqqarsaatigalugit ukioqatigiaat amerlassusaasa ineriarnerat eqqarsarnartoqarpoq. Utoqqaat amerliartuinnassapput, sulisinnaasullu ikiliartuinnassallutik.

Tamatuma kingunerissavaa assaat qaratsallu pilersuisussat ikinnerulissammata akileraarutinillu nunatsinnut inuiaqatigiinni atugaarissaarneq isumannaarniarlugu pilersuisussat aamma ikiliartussammata. Akerlianilli isumassugassat pilersugassallu amerliartuinnassallutik.

Inuiaqatigiittut isumannaagassaraarput suliffeqaraluarluni meeraqarnerup ajornannginnerulernissaa pilerinarnerulernissaalu aqquissiutissallutigit. Isertugaanngilaq Nunatsinni ernereerneremi sulinngiffeqarnissamut atugassat nunani avannarlerni allani atugassarititaasunit ajornerungaatsiarmata, sulisartunullu amerlasuunut, isertitat eqqarsaatigalugit, arlalinnik meeraqaraanni meeqqat alliartereranni toqqissisimallutik atugarissaarnissaat isumannaaruminaammat.

Tamanna allanngortittariaqarpalput.

Tamanna tunngavigalugu Inuit Ataqatigiinni siunnersuutigissavarput, Naalakkersuisut suliffeqarnermut tunngasunik nassuaasiornissamik peqquneqassasut nassuaammi amerlanerusunik meeraqarnissamut akornutaasinnaasut nalunaarsorneqarnissaat, mumiganillu ikorfartuutaasunik aqquissiussisumik aaliangiisarsinnaanissamik tunngavissinneqarnissaq anguniarlugu. Soorunami uani sulisoqarnermut attuumassutilit

akissarsianut sulinermilu atukkanut tunngasumik kiffaanngissuseqarlutik isumaqatiginninniarsinnaanerat ataqqineqassaaq.

Erseqqissassavarput siunnersuummi anguniarneqanngimmat sulisartut sulisitsisullu kattuffii akissarsianut suliamullu tunngasumik kiffaanngissuseqarlutik isumaqatigiinniarsinnaanerat akornusersorneqassasoq inuiaqatigiittulli naliginnaasumik suliffeqarfiiit qanoq ilusilikkat ilaqtariinnut meerartalinnut pilersinneqassanersut siunissamilu atorneqassanersut isumannaarniarneqarnissaa anguniagaammat.

Erseqqissumik ilaqtariinnut politikkeqarnissamut tunngavoq.

Ernereernermermi sulinngiffeqarnermi atugassaritinneqartut pineqartumi qitiulluinnarput. Nassuaasiорерup qulaajassavaa ernereernermermi sulinngiffeqarnissamut atugassat qanoq pitsangorsaavagineqarsinnaanersut, pisortani namminersortunilu sulisunut.

Inuit Ataqatigiinniit siornatigut siunnersuutigisimavarput ernereernermermi sulinngiffeqarnissamut aningaasaateqarfissamik pilersitsisoqassasoq. Maluginiarsimavarput sulisoqarnermut attuumassutilit siunnersuut tigulluarsimagaluaraat.

Ernereernermermi sulinngiffeqarnissamut atugassarititaasut pitsaanngorsarnissaat anguniarneqassasoq isumaqarpugut, tassunga ilanngullugu ataatat pitsaanerusumik atugassaqartinneqarnissaat anguniarneqartariaqarsoraarput, tamannalu nassuaasiорерmi qulaajagassaqqissutut piukkupparput.

Inuiaqatigiinni ilaqtariit nukittuut pisariaqartippavut, meeqqat toqqisisimanartumi perioriartornissaat anguniartuartariaqarpoq. Taamaattumik nassuaammi ilanngulugu misissortariaqarsoraarput qanoq ililluni isumannaarneqarsinnaanersoq angajoqqaat, naak suliffimminni ulapittaraluqaqlutik, meerartaarnissaminnut tunngaviisa pitsaanngorsarnissaat.

Tassungattaaq ilanngullugu kissaatigaarput ilinniartunut inissiat ilaqtariinnut naleqqussakkat amerlisarnissaat aqqutissiunneqassasoq angajoqqaat praktikkertut ilinniartuuusullu ilinniarnermeri nalaani ilaqtarminnut inissaqarluarniassammata.

Tamanna ilinniartitaanermut tunngavoq ilaqtariippassuilli ilinniarnermeri ingerlanerani imaluunnit sulillutik aallartinnermini meerartaartarput, tamannalu aamma inissaqartittariaqarparput.

Ilanngullugu kissaatigaarput kommuneni ilaqtariit atugaasa pitsanngorsarneqarsinnaaneri anguniarlugit qanoq iliortoqarsinnaanersoq paassisallugu. Meeqquerivinnut tunngatillugu qanoq iliuseqartoqassava imaluunniit meeqquerivinni inissat amingaatigineqarpata qanoq iliortoqassava?

Iluaqutaasanerpa meeqqueriviit ammasarnerisa annertusinissaat, taamaalilluni angajoqqaat piffissami allanngorartumi sulisartut sulineri naapertorlugit ammasassallutik? Inuuusuttunut angajoqqaanngorlaanut piffissami siullermi meerartaarsimanermi ilaqtariinngorlaatut suliffeqarnermut ataqtigiaissaarinissamut siunnersorneqarnissamut neqeroorutit naammanginarpat?

Nassuaatissap imaa aallaavigalugu Inuit Ataqatigiit isumaqarput, Naalakkersuisut sulisoqarnermik attuumassutillit sinnisaanik kommunenillu qaaqqusissasut sammisamut tunngasunik iliuusissanik tigussaasunik nassaarnissamut oqaloqatigiinnissaq siunertalarugu. Siunnersuut pillugu oqallinnissamut Inuit Ataqatigiit qilanaarput.

Neriuppugut inatsisartuinnaanngitsut inuiaqatigiilli tamarmik oqalliseqataassasut. Apeqqut pineqartoq tamatsinnut attuumassuteqarpoq, tamattalu sulissutigisariaqarparput aappariit inuuusuttut, angajoqqaallu sulisuugaluarlutik meeqqamik pilersuinissamik periarfissarissaarnerulissasut.

Pisortanut aningaasatigut allaffissornikkullu kingunerisassat.

Naatsorsuutigisariaqassaaq AC-fuldmægtigip ataatsip ukiup affaani atorneqarneranut 250.000 kruunit missaani aningaasartuuteqartoqassasoq.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Nalunaarusiorneq aallaqqaataani aningaasatigut kinguneqassanngilaq.

Innuttaasunut aningaasatigut allaffissornikkullu kingunerisassat.

Nalunaarusiorneq aallaqqaataani aningaasatigut kinguneqassanngilaq.